

## **Tekad tak mahu anak terima nasib sama**

Dibesarkan dalam keluarga yang susah dan ketinggalan dalam aspek pendidikan menjadi motivasi paling berharga bagi Tokoh Keluarga Mithali sambutan Maulidur Rasul Negeri Perak 2015, Arip Sa'aya, 61, memastikan anak-anaknya tidak menerima nasib sama sepertinya.

Menurut Arip, kesusahan banyak mendidik dirinya menjadi lebih cekal dan tidak putus asa.

“Saya bersyukur kerana diberi kelebihan dan kekuatan untuk menyebarkan ilmu walaupun sebelum ini terpaksa berdepan dengan kesusahan keluarga sejak kecil.

“Namun kesukaran itu yang membuatkan saya berazam untuk berjaya dan tidak pernah berhenti mengembangkan ilmu kepada masyarakat,” katanya yang ditemui selepas sambutan Majlis Maulidur Rasul Peringkat Negeri yang berlangsung di Pusat Konvensyen Aman Jaya, di sini semalam.

Arip dilahirkan di Kampung Jeliang, Manong dekat sini mempunyai 11 anak, yang sulung berusia 33 tahun dan paling bongsu berusia 11 tahun berkata, faktor kesempatan hidup itu juga membuatkan dia sanggup belajar sendiri di rumah tanpa ke sekolah bagi mengambil peperiksaan Sijil

Rendah Pelajaran (SRP), Sijil Pelajaran Malaysia (SPM) dan Sijil Tinggi Persekolahan Malaysia (STPM).

“Saya berpeluang belajar di Maktab Perguruan Islam di Bangi selama dua tahun sebelum lulus bagi menyambung pelajaran dalam Ijazah Sarjana Muda Pengajian Islam di UKM (Universiti Kebangsaan Malaysia) dan Sarjana Pengurusan Pendidikan di UTM (Universiti Teknologi Malaysia).

“Saya kini banyak terbabit dalam aktiviti pengajian agama dengan mengadakan kelas ceramah sebulan sekali dan mengadakan kursus motivasi solat kepada remaja,” katanya.